

黃平縣志

四

地 360.1177

41

部 224



黃平縣志卷四

建置志上

城池

官署

壇廟

總敘

周禮量人以建國之法營國城郭營后宮量市朝道巷門渠造都邑掌之量人又掌之掌固以時修之凡守者受法焉聖人治天下雖不侈於宮室臺池之觀而城隍不修學校不設堂皇不闢倉庾壇廟廢而不治道無阻固川無舟梁非所以壯金湯嚴體統廣教化崇祀典也我州樂源狼洞之名原於宋而黃平則始於元其建置無可稽矣明初建邦啟土或為衛或為所或為州量地制邑度地居民所為經營締造者蓋三百年我國家體國經野因其舊而損益之區畫盡善規模

黃平縣志

卷四 總敘

宏遠凡城垣斥堠官師廨署壇廟坊表津梁罔不修飾誠哉度越千古者也 原敘

城池

春秋所書城二十有五亦王公設險以守其國之意胡氏皆以為譏吾不謂然黃平城建自前明依山帶水四塞為固緣實逼苗疆伏莽升陵偶或為患桑土綢繆固未可或緩也乾隆二年新舊兩州之城一時並修後又鼎建重安巖門二城百雉崇墉指臂相應隱隱然獨當貴陽東北一面我民沐浴膏澤安堵奠居地利人和屹然保障矣 原敘

黃平州城原為興隆衛城明洪武二十六年潁國公傅友德建指揮周興并張龍胡質蕭琳等以次督修甃石週圍五百三十丈高一丈五尺廣八尺門四東曰豐潤西曰宣威南曰鎮安北曰昭化門各有樓鋪三十六串樓一百三十間上下水

黃平縣志

卷四 城池

二

關二座明季罹兵燹之變又遭土寇之亂墻垣塌壞角樓礮臺俱圯

清康熙二十六年裁衛入州移州治於衛城雍正乙卯苗變城遂不守乾隆二年總督張廣泗具題命知州金作楫督修週圍一千零九丈九尺計五里七分城身高一丈一尺垛墻高六尺計一千二百一十六堵城門四座門有樓炮臺四座炮有房水關二座有木柵但四門無月城似為缺典及今一百八十餘年風飄雨蝕不無坍塌雖隨圮隨修究難完好今僅存南門一樓

舊城向建於天官寨今顏垣學址尚存不知何時移建今址明神宗朝從巡撫郭子章請設州州牧曹進可督修基以石甃

以磚週圍九里三分一十八步東西南北皆命曰平門各有樓東曰來春南曰七星西曰慶成北曰武勝有碑後州牧李逢春增造串樓一千三百間環城有池崇禎六年加深環城內有馬道以便巡邏明末土寇藍二之變悉毀之雍正乙卯再毀於苗乾隆二年總督張廣泗題奏命知州金作楫與新州城同時重修易磚以石週圍一千四百零七丈七尺計七里八分零門與炮臺水關如新州城後漸坍塌附近居民漸闢為路以便樵汲四十七年州牧袁治勘估工料通詳列入緩修嘉慶元年城中紳士捐貲補葺然僅塞其徑竇睥睨樓櫓及石之朽惡基之斜陷尚有待云
安慶
按門後改東曰隆遠南曰青雲西曰樂平北曰

黃平縣志

卷四 城池

三

重安汎城舊有土垣距今城二里許即今之堡上也因石橋在下流為驛道所經故建城其地而路貫其中後橋圯而故沙溪不時泛漲艱於厲揭遂移浮橋與渡於上因建石城其年月無稽矣康熙十年添設驛站建公館倉廩於內乾隆二十一年重修為門者五炮臺一座週圍三百五十五丈五尺計一里九分二釐零城身高一丈塚城高四尺計三百六十五堵至今稱穩固焉

按重安江距城南三十里即重安土司舊治也土司於清嘉慶間移住巖鶯壘城雖僅外委附守然倚山為固阻江為險右臨渡口前明香爐山苗叛恃此為捍禦雍正乙卯哈將軍尚德亦據以殲苗巍然一保障也江通小舟上至

平越下至截洞換舟以達於楚

巖門司城舊在河南岸雍正乙卯三土司據守於此以阻台拱生苗土城薄惡力不能支皆赴水死乾隆初年移建今址週圍四百八十八丈九尺計二里七分七厘城身高一丈塼墻高四尺共四百九十九堵為門者三炮臺三座水關二座門有樓炮有房可據險而守焉

按巖門司距城東南八十餘里後倚高山前阻深江上接重安凱里下達沅靖過江則通台拱垣墉屹屹雄據諸蠻東南一重地也黃平衛駐城西偏所以約束型堡中為土司治東為分防把總署所以彈壓諸苗近則絃誦聿興瓦屋鱗次艤舟而入者莫識為苗地矣國家之陶淑誠無遠

黃平縣志

卷四 城池

四

弗屈哉

又按州東南八十里有新城城外四週苗寨皆屬州境因係施秉縣汎地城內士衿均係縣屬故不具載又乾隆二
年安設各堡俱築有土垣年月既久有坍塌者

官署

官司有守表正有位懸法布象下民觀瞻係焉蓋民非政不治政非官不行此古今之通制也故郡邑莫重於治治莫重於官官莫重於地地莫重於人地以署表人以職列官之所以為治者其在斯歟夫甘棠憩召南園猶歌咏之矧為攸躋攸芋地耶原敘

黃平縣署原為州署舊為興隆衛署雍正乙卯毀於苗創建無考乾隆二年州牧金公作揖重建照牆一座頭門三間儀門五間大堂三間書吏房東西各五間二堂五間高公屋煥重建捲棚一座客廳三間東廚房三間內宅門一間內署五間左右廂各二間東後樓三間內廚房三間內西書房二進六間西幕

黃平縣志

卷四 官署

五

廳三間

皆袁公治重修

二門外西押候所三間監獄一所

分縣署乾隆二十八年修照牆一座頭門三間廂房二間大堂三間內堂三間捲棚一間東廂房五間東廚房一間西廂房二間

壇廟

嘗謂至治之世陰陽和風雨時百穀用成雖由於政之善要亦享祀豐潔誠之所至神斯格之理固然也故凡有土地人民之責者莫不有祈報之舉合幽明而展誠敬以為民求福詩曰懷柔百神易曰聖人以神道設教而天下服有其舉之為敢廢諸

文廟名宦鄉賢祠詳教育志

風雲雷雨山川城隍壇在城北歲以春秋仲月上戊日致祭社稷壇在城南門外半里有石臺歲遵照春秋仲月吉日致祭

先農壇在城東門外里許前額豐亭一間門樓一座正殿三

黃平縣志

卷四 壇廟

六

間神倉三間神器所一間石臺一道四週土垣俱州牧袁公治重修歲遵照仲春吉日率文武官員耆老農夫致祭城隍廟在城內東隅

邑厲壇在北門外歲以三月清明日七月十五日十月十五日迎城隍祀之而頒其惠於養濟院之孤貧者

關帝廟在東門內歲以春秋仲月吉日致祭

關帝三代廟同日致祭

文昌閣在學宮右歲以春秋仲月上丁日致祭

羅公祠在城東玉皇閣側祀前署州牧殉難羅公鳴序配以平伐營把總黃進忠幕友陳憲旁祀殉難諸生初震初咸等二十二人皆雍正十三年死事者歲春秋仲月上丁日

致祭

郭公祠祀明巡撫郭公子章一在舊城寶相寺一於乾隆五十四年袁公治重建城東十里之平龍橋士民新建祠於橋北元真觀側專祀郭公以袁公治配

鄭公祠祀前明署州平越府同知鄭公廷英在舊城東門城樓上

義烈祠在東坡元真觀下前明巡撫郭公子章建祀前明千百戶之死事者

黑神廟在舊州西門外祀唐南公霽雲

黃平縣志



卷四 壇廟